

Dos orador prominente durante anochi di Fundraising Epilepsia

DIAHUEBS awor Stichting Epilepsia Aruba lo tene un anochi di fundraising na Cas di Cultura cu dos orador prominente, den persona di Sra. Jane Figaroa-Semeleer di Banco Central di Aruba y Sra Emily de Jongh-Elhage, den su calidad di Prome Minister di Antiyas.

Sra. Jane Figaroa-Semeleer, cu aña pasa a wordo nombra Presidente di Banco Central di Aruba, lo tene un discurso riba e rol di Banco Central den e recesion cu ta menasando nos pais cada dia mas y mas y cu ta motibo di hopi preocupacion. E sindicato mas grandi di Aruba, FTA, den e dianan aki ta haciendo un yamada dramatico na doñonan di trabao pa no corta den cuponan di trabao. Ta importante pa tende ki mensahe Banco Central tin den e situa-

cion serio aki cu tin hopi hende hopi preocupa.

E otro orador lo ta Sra. Emily De Jongh-Elhage, Minister-President di Antiyas Hulandes cu lo papia riba e ultimo desaroyonan estatal na Antiyas. Manera ta conoci, e pais di cinco islanan aki lo wordu desmantela unda Corsou y St. Maarten lo bira pais den Reino Hulandes mientras e otro islanan, Boneiro, Saba y St Eustatius lo haya un tipo di status di gemeente di Hulanda. Poco dia pasa den un referendum Corsou a aproba e acuerdo estatal nobo cu Hulanda cu un mayoria chikito loke no a haci e situacion politico mas facil na Corsou.

Riba tur e temanan aki e Premier di Antiyas lo duna su punto di bista. Sin duda asuntunan hopi actual y interesante.

E anochi aki ta wordu organisa

door di Stichting Epilepsie Aruba pa por inicia un campaña di informacion riba epilepsie na tur kleuterschool y scolnan basico e aña escolar nobo. E evento aki ta tuma lugar diahuebs 28 di mei 2009 pa 19.30 or den Cas di Cultura. Despues lo tin un brindis den e patio di Cas di Cultura. Carchi ta costa Af. 125,00 pa persona y ta obtenibel na Office Systems Aruba, Write Here, Van Dorp y na San Nicolaas cerca Father Jacobs.

